

**COLLECTIVITE TERRITORIALE DE CORSE
ASSEMBLEE DE CORSE**

2ème SESSION ORDINAIRE POUR 2014

REUNION DES 30 ET 31 OCTOBRE

N° 2014/O2/047

**QUISTIONE A BOCCA POSTA DA SAVERIU LUCIANI
A NOME DI U GRUPPU « FEMU A CORSICA »**

Ogettu : Bandera corsa è razzisimu anti corsu.

O Sgiò Presidente,

Luni scorsu Femu a Corsica hà chjamatu à un'addunita generale in Corti per urganizà una risposta popolare di i corsi, di pettu à l'inghjulia fatta à u simbulu u più forte di u Populu Corsu, a nostra bandera.

I naziunalisti ch'è no simu a dicenu oghje : ùn lasceremu più fà è risponderemu à qualunque assaltu di quelli chì si permettenu à laziu d'imbruttà è di disprezzà stu paese, à traversu a nostra bandera. Ci vole ch'ella pianta è subito ! Serà u sensu di a muzione ch'è no presenteremu à sta sessione.

In corte parolle, oghje pratendimu ch'ellu esiste dipoi sempre una forma di razzisimu anti corsu. Hè un fattu storicu ch'ùn si pò negà è chì à i ghjorni d'oghje piglia à multiplicassi, à palesu, à quandu in u duminiu spurtivu, à quandu in certi canali d'infurmazione, à quandu à cullà, à passà o à vene.

Ma u peghju hè chì tutte ste campagnate ricevenu, voli sì voli nò, l'accunsentu di a « pariginità ».

Ch'ellu si parli di u Sporting o d'altri associ spurtivi, di l'arrestati ministeriali o prefetturali ingiru à certe partite di ballò in Corsica o in Francia, ch'ellu sia per indettu in l'impaginate di u magazinu « Capital », a Corsica è i corsi sò cagione di tuttu.

A più bella ferma quantunque l'accuse purtate contr'à u purtieru bastiacci Jean Louis Leca, culpevule d'avè fattu sventulà a nostra bandera dopu à a vittoria di u Sporting in Nizza. Ci parenu fole ma à l'esciuta, ùn sò chè discriminazione è inghjustizie per faccile falà scutate.

Ùn ne simu più d'un scontru spurtivu qualunque, ma si tratta di a Corsica. È d'una bandera è di una memoria chì ci venenu da u seculu Tredecim.

Femucila corta : oghje ùn ne simu più à vucerà o à ghjimbà u capu. Abbisogna una volta per sempre una reazione cullettiva di a rappresentazione eletta di a Corsica.

Ma nanzu di compie, un passu in daretu : u 26 di nuvembre di u 2010, l'Assemblea di Corsica hà vutatu à l'unanimità a muzione di Femu a Corsica, quella chì dumandava di cambià u logò di a Cullettività di tandu, è di rimpiazzallu, adduttendu da logò a TESTA MORA di a nostra bandera nazionale.

Sta bandera ùn hà mica partitu, hè quella di noi altri tutti, di quelli chì campanu quì è forse di certi chì campanu in altrò.

Allora, à nome di noi altri tutti, l'eletti di Femu a Corsica vi dumandanu di sprime di manera sulenne l'indignazione nostra di pettu à accuse, detti è cumportamenti di sta spressione inaccettevule di u razzisimu anti corsu è di sta negazione di ciò ch'è no simu. È perfine, falli capì, di manera più chè chjara a nostra vulintà di fà fronte, à nome di ciò chì ci porta à tutti dipoi sempre, vogliu vene à di a Bandera di u Populu Corsu.

À ringraziavi.